

欽定剿平三省邪匪方略

欽定剿平三省邪匪方略正編卷一百六十三

庚申年

四月初二日

甲申

那彥成奏言竊高馬二姓賊匪

連殺官兵截剿直向南竄

臣

帶兵緊躡由宕昌

南峪寨前進沿途擒獲蔣進忠等五十七名逐

加訊問據供賊匪因官兵追急僞先鋒王進連

在南峪寨地方自縊身死僞元帥賈正謨掌旗

賊目劉世龍在南峪寨投河淹斃此股賊匪尙

有四千餘人總要向大山老林中逃竄使官兵不能追趕等語

臣

查南峪寨以南大山綿亘賊

由黑色坪拗子山奔竄此路最爲險峻亦最徑捷他處無路繞截若再紆道前往賊蹤已遠勢難追及隨督官兵晝夜兼程前進於十四日至拗子山上下一百三十餘里深林密箐不見天日冰凌滿山積雪初融泥深四五尺步步陡滑

自寅至亥始過此山鍋帳俱未趕到十五日至  
寨中寨乘有月色挑出奮勇官兵連夜進發十  
六日寅刻至文縣河邊探得賊已跣淺過河圍  
攻卡狼寨土堡甚爲危急詳詢該處地勢河北  
係登樓山與卡狼寨隔河相對河南爲郭家山  
高礪臨河卽係寨堡賊佔高處我兵難以徑渡  
慶成先派遊擊崔恒德都司李國棟率領兵丁

携帶鎗礮預至登樓山頂樹林內隱藏俟兵丁  
涉水時從山上向南岸轟擊使賊匪不能撲近  
河邊以便我兵共濟

臣

隨飭令總管秦巴圖協

領青山叅將蕭福祿帶領馬隊先於上游渡河  
扎克塔爾桑吉斯塔爾綸布春慶成等督率步  
兵鄉勇於下遊分渡俟至高礮下會齊再行併  
力撲卡賊匪知馬隊渡過步隊解衣涉水甫經

半渡遂分數股撲來崔恒德李國棟在登樓山  
頂望見卽至半山排列隊伍開放鎗礮連環不  
斷賊匪稍却步隊全行登岸與馬隊一齊衝出  
雖衣履沾濕而人人奮勇競進所向無前賊匪  
復山寨後撤上郭家山西首山梁乘高下壓另  
分一股在草地溝石峽內埋伏我兵亦分三路  
桑吉斯塔爾綸布春帶領遊擊張明德都司楊

正明千總馬福全鄉勇萬標等由西首跟蹤上  
攻慶成帶領遊擊王延年都司朱廷舉守備郭  
洪鄉勇周天章張起鰲等由東首山梁迎頭上  
攻札克塔爾帶領都司孫維賢吳亨衍鄉勇李  
金銘齊慎等由中路上攻並截住石峽內埋伏  
之賊其時山上賊匪搖旗壓下我兵屹然不動  
俟賊匪逼近擊死持旗賊目多人桑吉斯塔爾

綸布春等催兵搶上將賊匪逼過東首山梁慶  
成等督率將弁兵丁橫衝賊隊截爲數股札克  
塔爾復由中路追殺三路併力鎗箭如雨有鎗  
內裝入鉛子二枚一發斃二人者賊匪登時奔  
潰竄入石峽希冀埋伏之賊掩襲追兵詎知石  
峽險窄上下俱有官軍前邀後截賊匪不得衝  
出短兵相接屍橫遍地且因賊隊騾馬與婦女



幼孩等擁擠不開自相踐踏死者無算騾馬器械包裹拋棄滿溝此次共殺賊一千三百餘名割認首級有首逆馬五之子馬狗兒副元帥李大旺簡正文楊開貴三名賊目浦老大王玉衡唐老五三名生擒賊目朱坤傳屠用倫二名活賊鍾應華等五百七十二名所有割取首級及拿獲活賊令鍾應華等逐一辨識除大賊目外

多係老教矛手其在前奔竄之賊於石崖無路  
處所攀援競上追逼緊急從崖上滾落跌斃者  
又有二百餘名逃散難民復有千餘奪獲刀矛  
器械一千餘件騾馬無數卡狼寨堡內居民見  
官兵大勝文武生員朱玉粟鄉約耆民周達元  
等數十人在道傍跪迎據稱堡內煙戶本多加  
以各村避難男婦共有一萬餘人今早賊匪來

攻鄉民並無守禦之具且勢將攻陷幸得大兵  
趕到殲除賊衆闔寨生靈方得保全並因官兵  
遠來以小米煮粥送至軍營察看感激情詞極  
爲真切臣已面加撫慰酌賞遣回諭令附近居  
民俱各歸莊安業至滾山奔竄之賊研訊活賊  
供稱此股屢經痛剿所剩襄陽老教戰手多半  
被殺僅存數十人矛手亦祇數百人並婦女及

畏脅者不及一千已屬十分窮蹙

臣

查此股敗

匪由卡狼寨南竄前係大山老林無兵攔截卽  
可折回川境聞總兵百祥現在龍安境內帶兵  
駐守該鎮打仗勇往熟悉地利堪以就近迎剿  
如賊已從無兵地方繞過卽可將分佈卡兵歸  
集爲剿賊之用且探得階州秦州及棧道一帶  
賊股肆竄地方寬廣僅有額勒登保一路之兵

可恃不敷分擊臣若專剿此股置陝甘他股於

不問是此敗殘賊衆牽綴一路官兵恐陝甘不

能早就肅清轉於大局無益臣現在一路兵力

勢難再分已一面札飭百祥帶兵就近截剿並

飛咨德楞泰魁倫相機酌辦臣惟有與額勒登

保同心協力速奏蕩平卽帶勝兵同赴川省以

期迅殄賊氛再都司銜守備楊正明帶領貴州

兵向爲首在此次打仗在前衝壓殺賊尤多因  
單騎出隊追賊三被矛傷陣亡其餘傷亡兵勇  
數名查明咨部辦理奏入

上命軍機大臣傳諭那彥成曰此次圍攻卡根寨賊  
匪派兵設伏分路進擊殺賊一千三百餘名並將  
馬狗兒等殲斃自屬勝仗將士亦覺奮勉但那彥  
成如果將此股賊匪剿淨肅清一路朕必加之恩

賞今並未剿盡仍任幾及千名之賊匪由卡狼寨  
南竄又必蔓延那彥成實難辭咎惟念伊此次帶  
兵翻山衝冒冰雪兵丁涉水衣履沾濕不避艱險  
並將幾被攻陷之卡狼寨保護無虞寨內煙戶萬  
餘俱得生全猶堪嘉獎此時卽僅將那彥成予以  
罰俸處分朕亦不忍出諸口其功過尙足相抵就  
目下剿辦大局而論自以陝省爲重那彥成應仍

遵照前奏由甘而陝與額勒登保併力擊剿以期  
速奏蕩平方爲正辦但高馬二姓擊敗餘匪僅交  
總兵百祥在彼截剿恐不能兼顧且現在川西賊  
匪又有搶渡潼河者德楞泰現有彼處應辦緊要  
之賊豈能顧及龍安竄匪卽令百祥果能攔截難  
保不又竄回甘省倘百祥堵禦不力竟至越過龍  
安又添川省一股竄匪並恐褻脅人衆復至蔓延



現已降旨令廣厚在邊境一帶扼要堵剿其竄至  
龍安之賊俟德楞泰等奏到百祥如何堵禦情形  
再爲指示那彥成務須與額勒登保同心協力將  
此一股搜剿淨盡不得復留餘孽視若遲而轉速  
若得一勝仗又舍此顧彼徒勞跋涉新賊未平舊  
賊復熾何時始能集事耶所有都司銜守備楊正  
明單騎追賊三被矛傷陣亡殊爲可惜著加等照

都司銜咨部予卹

上又命軍機大臣傳諭廣厚曰本日那彥成奏追賊  
至卡狼寨地方痛剿賊衆殲擒賊目多名餘匪由  
卡狼寨南竄聞總兵百祥現在龍安帶兵駐守當  
卽札飭該鎮就近截剿但恐賊匪因該處堵禦嚴  
緊並聞叅贊已帶兵赴陝仍復折向西竄其現竄  
陝境之賊亦恐有折回甘境者著廣厚於甘省邊

境要隘地方相機堵截以遏賊匪竄回甘境之路  
廣厚辦理防堵事宜向來頗爲出力此時務須督  
率兵勇實力堵截不可稍有疎懈

初三日

乙酉

德楞泰奏言

臣

前於劍州李家坪石

門寨將張子聰等股賊衆大加殲除各逆遂由

南部鹽亭日夜狂奔日行百數十里

臣

盡力跟

蹤緊躡逐日擒斬並渙散者不少十八日抵富

村驛探報賊匪屯聚玉隆鎮天仙寺一帶有前  
隊馬步賊匪數百人先赴潼河王家嘴窺伺查  
魁倫前已通飭各州縣將江河兩岸船隻提泊  
各府州縣處所其潼綿一帶沿河灘口俱派  
有員弁兵勇設卡防堵甚爲嚴緊茲賊已逼至  
河邊自投絕地正是極好機會當卽挑派兵勇  
二百名邁道前去臣亦卽進發十九日酉刻前

派兵勇趕至王家嘴時馬賊早已淌過惟步賊  
係船載渡尙未過完岸邊喧嚷爭渡經兵勇在  
山梁吶喊放鎗賊匪驚亂急流中淹斃者約七  
八百人兵勇見餘賊無多直下河岸有跪首難  
民男婦宋克全杜樊氏等二百四十三名口尙  
有賊匪百餘人由河岸古井口奔逃追擒四十  
餘名餘俱投河淹斃

臣

晝夜趲行於二十日寅

刻趕到不料該處河內船隻該縣並未遵照撤  
泊他處致啟賊匪窺伺追馬賊洶渡搶船兵勇  
又不能實力堵禦潰散而逃

臣

憤恨焦灼應卽

嚴叅以示懲儆因不知所派何人無從查究已  
札致魁倫查核嚴叅俾河防員弁各知凜愼隨  
卽一面派令兵勇搭橋一面將獲犯難民分別  
辦理是日過河由太和鎮趕至十字嶺探得該

逆等分股一由柳樹沱奔竄係通遂寧之路一  
由景福院奔竄係通省城大路仍在兩河之中  
惟屢據獲犯及難民等僉供各逆尙欲渡嘉陵  
大江逃奔此時江防更爲緊要

臣

卽飛飭江防

文武日夜實力堵禦並飛咨魁倫勒保將潼綿  
一帶防兵並施縉所帶之兵卽速管領分路剿  
辦並將阿哈保所帶馬隊三百餘名先已撥赴

勒保處協剿又恐沿江州縣不足深恃復札署  
總兵托雲泰分帶官兵二千名迅由射洪洋道  
溪一帶過河在兩江之中嚴查沿江船隻並探  
東西兩岸賊蹤以防賊渡臣星夜卽由景福院  
大路前進遏其西竄鼓勵兵勇盡力趕追二十  
二日官兵由三台縣屬兩河口石板灘進發途  
次據報賊匪大隊現屯蓬溪縣屬新店子又分



股賊匪在附近七八里及十數里之成谷太和

仁和仁義四寨圍攻臣查賊巢現在新店子而

四寨又復被圍我兵勢難處處並進若巢穴一

破寨圍自必立解行至望川山距新店子八九

里臣卽派侍衛達勒精阿副將倭星額等分帶

馬步兵勇二千名由觀音巖田壩子飛奔赴救

各寨其新店子賊巢派令副都統賽冲阿溫春

侍衛富僧德協領明德穆騰額叅將閔懷希等  
帶領馬步隊由左山梁老鶴嘴抄截副都統銜  
阿穆勒塔總兵李紹祖侍衛阿納保薩寧阿總  
管色爾滾富登額叅將沈慶春等帶領馬步隊  
由右山梁萬福橋抄截臣督率侍衛法依當阿  
克什布副將馬瑜叅將達自祥蒲尙佐等由廖  
家壩灘子前抵新店子賊巢適衆賊正在造

飯不防馬兵驟至直衝入場步隊接踵而進左  
右山梁官兵一齊壓下立殺賊匪五六百名場  
內賊衆措手不及登時潰亂馬驟牛驢并衣包  
等物盡行丟棄直奔打銅埡口佔踞擲石放鎗  
捨死抗拒賊匪滿山旗幟如林各路官兵分投  
奮力仰攻相持一時之久復用連環鎗礮轟擊  
斃賊無算臣以被擄人多一時玉石難分情堪

憫惻令各官兵傳宣

恩旨難民投出者一概免死給以銀米路票回籍卽  
有棄械投奔馬前難民劉世長楊張氏等二千  
一百餘名口賊匪一見難民投出勢已渙散官  
兵乘勝搶上打銅埡殺賊六百餘名餘匪力不  
能支紛紛敗向天星橋而逃生擒男婦大小謝  
老六李陳氏等一千一百二十七名口查該處

兩面層疊石崖中稍平曠又係堰塘稻田路徑  
逼仄賊衆被追擁擠有滾入堰塘淹斃者約二  
三百人有後賊戳傷前賊奪路而逃者又有陷  
入水田內者擒獲賊匪王升林等一百八十七  
名其派赴救援四寨之達勒精阿等帶領官兵  
先至成谷太和兩寨聞哭聲震地勢極危急適  
我兵趕到見每處賊匪不過千餘人分投剿殺

共斃賊百餘名賊卽奔逃兩圍立解時圍攻仁和仁義兩寨之賊見官兵已將兩寨賊匪剿敗先已遁走迨我兵趕至寨下四寨百姓萬數千人俱各感激

天恩紳士耆老相率來營叩謝當用好言撫慰曉以守防之道並將所獲鎗礮刀矛牛隻分賞各寨以備守禦耕作無不歡欣鼓舞而去餘匪敗向

大堰塘奔逃時已申刻卽於石簡山紮營訊據  
獲犯並難民僉供此股賊係白號張子聰度向  
瑤雷世旺三人爲元帥又有傳教老師傅孫老  
六是從前官兵在亂石灘擊斃襄陽掌教孫嗣  
俸卽孫老五之弟營裡元帥都要聽他號令今  
日在新店子派四路人馬破四個寨子不料官  
兵殺進措手不及大衆走上打銅壩雷世旺正

在壩口督催打仗忽被鎗打死衆人亂奔孫老  
六走到堰塘坎上亦被亂箭射死又經各難民  
指出生擒僞總兵吳學周旗首探馬頭目劉品  
昌王子新岳永崇吳永泰張開甲韓文順等七  
名首級內認出僞元帥雷世旺傳教老師傅孫  
老六僞總兵王作唐李大先羅之孝等五名臣  
復令吳學周等指認歷歷不爽復令素識之鄉



勇首守備羅思舉及所帶鄉勇內有認識雷世  
旺並孫老六者均指屬實無疑此次共獲騾馬  
一千二百餘匹牛二百餘隻大礮五位鎗二百  
餘桿刀矛二千八百餘件大小旗幟三百一十  
二面計投出難民二千一百餘名口生擒難民  
匪犯共一千三百一十四名口除投出男婦大  
小難民內並有貢監生員均係附近州縣之人

俱給與路票銀米回籍外惟嘉陵江以東各犯  
七百餘名與賊目吳學周等十二名分別凌遲  
正法其餘被脅未久難民一概釋放查該匪過  
河後經此剿殺勢已膽寒現由大堰塘奔竄左  
通遂寧中通安岳右通資州當令兵勇跟蹤探  
明卽行前進又探藍黃青三號餘匪現在胖子  
店一帶游奕而魁倫勒保帶兵前來正可兩面

夾擊

臣

原以川西地方平衍素爲繁庶完善民

情懦怯賊匪驟至躲避無地恐百姓受其荼毒

是以不分晝夜緊追賊蹤未能卽時將渡河情

形具奏連日不予以暇得以痛殲此皆仰賴

皇上天威福庇

臣

惟有竭力將此數股賊匪迅卽剿

除斷不使其竄

同日阿迪斯奏言竊

臣

接奉

諭旨跪讀之下不勝悚惶戰慄臣駐守大寧原無專

防何股之賊且距省二千餘里一切情形得信

較遲但聞賊匪在遂寧蓬溪一帶滋擾臣終夜

焦思未得一緊要情事具奏實屬庸劣無能至

省城重地因思魁倫處尙有兵七八千名足資

堵禦而臣素有足疾不能行走迅速緩不濟急

是以未經奏請前往防守總之臣受

恩深重並不敢萌退縮之念而福薄命蹇每爲足疾  
所累遂至獲咎日深惟有仰懇

天恩俯賜罷斥治罪再臣接據魁倫咨稱因臣自大

寧前赴魁倫軍營路出梁山卽可就近剿捕賊

匪查梁山賊匪係三月初二日在土門場一帶

滋擾經該汛把總龍廷貴於初六日殺賊數名

驅逐出境臣於三月初二日自大寧起身初三

日抵甘溪口距梁山尙隔六百餘里並未遇見  
賊匪現在大竹縣有賊匪徐萬富在彼滋擾已  
派遊擊夏雲龍帶兵勇五百名前往剿捕茲於  
二十日行抵重慶正欲派兵前往太平東鄉一  
帶會合叅將楊秀防堵二十一日申刻接合州  
知州龔際美稟報三月十八日遂寧縣有賊匪  
一股滋擾該處地近省城若任其往來奔竄所

關綦重必須前往遂寧銅梁堵截方可扼其竄

往榮昌瀘州一帶完善地方之路今臣與七十

五商酌將現有之兵九百四十名卽派遊擊

祿沈文同等前往剿堵臣因途間足疾愈重不

能騎馬現在重慶候

旨不勝恐懼羞愧之至均奏入

上命軍機大臣傳諭德楞泰勒保曰前此德楞泰在

劍州李家坪等處將張子聰等股賊衆大加殲戮  
後復跟蹤追剿竄往南部鹽亭賊匪原冀前有潼  
河阻隔趁此極好機會將賊匪追至河邊逼投絕  
地以期一鼓殲除詎料該處河內船隻並未撤泊  
他處而兵勇又不能實力堵禦以致騎馬之賊得  
以淌渡搶船竄過潼河西岸德楞楞泰帶兵踵至追  
擊未經渡河之步賊殲獲淹斃者甚多並緊躡賊



蹤無分晝夜盡力追趕賊匪正在新店子地方屯聚造飯德楞泰卽率官兵分投搶撲山梁奮力截擊擒殄首逆要犯及大小頭目多名共殲賊匪一千三四百名擒獲匪犯及被脅難民一千三百餘名口並救出四寨被圍之百姓一萬數千人實屬可嘉之至德楞泰爲國出力拯救良民旬日之間捷音連至自應再加懋賞用獎勤勞德楞泰前已

封爲三等子著晉封一等子實授成都將軍至派  
往剿辦圍逼成谷太和等四寨賊匪救出一萬數  
千良民之侍衛達勒精阿副將倭星額及隨同德  
楞泰打仗出力之副都統賽冲阿溫春副都統銜  
阿穆勒塔總兵李紹祖俱著交部從優議敘此外  
如有出力人員仍著德楞泰查明具奏再降恩諭  
至防堵潼河正當剿賊萬緊之際早經魁倫飭令

地方官將所有船隻盡行移泊他處以防賊匪搶  
渡乃該縣並不遵照辦理使賊匪得以搶船逕渡  
總督魁倫卽因此革職拿問且潼河西岸繁庶之  
區頓遭焚掠此次荼毒生靈不可勝計皆由該縣  
疎縱所致卽律以抵償亦罪所應得著德楞泰勒  
保查明該縣係屬何人一面奏聞一面卽在賊匪  
搶渡地方正法俾沿河沿江一帶防堵各員知所

炯戒此外如有同在該處防堵之員亦著一併查明嚴叅治罪至此項船隻亦應查明如並非賊匪搶得或竟係該船水手爲賊濟渡亦當查明一併正法此時賊匪雖已搶過潼河分投奔竄據奏仍在兩河之間檢查魁倫前此奏到圖內潼河南面尙有河一道所繪河形雖不及潼河嘉陵江之大並未註有河名但賊匪究有一水阻隔昨據勒保

奏伊帶兵於中江一帶進發知會施縉帶領黔兵  
在潼川迎擊此時德楞泰自東而西勒保施縉自  
西而東正可乘賊匪在兩河之間前後夾擊悉數  
殲擒肅清川西地方並著查明潼河南面小河係  
屬何名附便具奏又本日據阿迪斯奏大竹遂寧  
地方均有賊匪滋擾阿迪斯並未親往僅派令遊  
擊等帶兵數百名前往剿捕殊不足恃除降旨將

阿迪斯治罪外著再傳諭德楞泰勒保遵照昨旨  
速派得力鎮將帶兵卽往剿捕伊二人係本省總  
督將軍必當通盤籌計勿令川北賊匪再有蔓延  
上諭內閣曰上年魁倫在京時屢在朕前懇求前往  
四川剿賊並言伊前任四川營官熟悉地方情形  
於辦理囑匪時晝夜乘馬搜捕不予以暇囑匪奔  
逃疲困用能克期竣事彼時朕已覺其言大而夸

因川省帶兵大員辦賊遲緩用額勒登保爲經畧  
令魁倫暫署總督原不任以剿賊之事魁倫自到  
川後於辦理地方團聚堡寨事務尙爲妥協嗣因  
大股賊匪竄往甘省額勒登保帶兵赴甘遂將川  
省剿賊事宜交與魁倫接辦魁倫若自揣不能勝  
任或留額勒登保在彼或奏明另派他人接手乃  
竟欣然樂從直任不辭而接辦以後復藉等候調

兵料理軍裝爲詞在達州逗遛八日致賊匪得以  
搶渡嘉陵江肆行焚掠魁倫於賊匪渡江後始帶  
兵前往仍未親身督戰僅令阿哈保朱射斗分兵  
追趕後無接應以致朱射斗被賊抄截力戰陣亡  
魁倫因此更形恇怯不復帶兵剿賊專在潼河一  
帶督率防守當賊匪搶渡嘉陵江時勢頗鴟張若  
逞其奔突竟可直犯成都幸而賊匪專以擄掠爲



事在西充地方因徐添德生日演劇酣飲無暇往  
撲魁倫營盤而魁倫因賊匪休息之暇得以分布  
兵勇防守潼河又素朕早降諭旨令德楞泰帶兵  
由陝赴川協剿德楞泰星夜帶兵從廣元昭化直  
赴川西連次克捷將首逆陳得俸冉添元李斌等  
先後殲擒因念魁倫不能防禦嘉陵江之罪雖重  
而防守潼河尙能嚴密俾德楞泰得以緊追賊匪

連次克捷魁倫亦尙有微勞是以加恩不加斥革  
降爲三品頂戴仍留總督本任其疎於防江之罪  
卽以此示懲不更交部嚴議並節次降旨以防守  
潼河係魁倫生死關鍵不可再有疎忽諄諄飭諭  
至再至三乃昨據魁倫奏賊匪在太和鎮上游之  
王家嘴地方搶渡潼河朕因此刻深焦厯幸德楞  
恭帶兵踵至無分晝夜盡力追擊擒殄首逆要犯

及大小頭目共殲賊一千三四百名生擒匪犯一  
千三百餘名救出被圍四寨難民萬數千人川西  
竄匪指日即可肅清而魁倫前此旣縱賊渡過嘉  
陵江今又縱賊竄渡潼河不特川西繁庶之區遭  
賊蹂躪而荼毒生靈又不知凡幾若不將魁倫治  
罪則貽誤封疆者何以示儆魁倫前已有旨革職  
拿問其四川總督已令勒保暫行署理魁倫卽交

勒保審明按律定擬具奏在成都監禁候旨至魁  
倫之子三等侍衛完顏札拉芬昨已退出乾清門  
今魁倫既獲重罪且完顏札拉芬人亦平常不勝  
侍衛之任著革職伊家原有輕車都尉世職著該  
旗於年終照例辦理至阿迪斯係大學士阿桂之  
子上年經朕加恩補授成都將軍自應倍加威奮  
力圖報効伊素有足疾如果自揣不能稱職卽當

面奏更換乃彼時並無一言懇辭到川以後額勒  
登保等祇令其駐紮大寧防堵自因其帶兵剿賊  
不能得力伊竟在彼株守迄今半載有餘並未移  
動前此川北賊匪搶過嘉陵江擾及川西完善地  
方阿迪斯係本省將軍視同膜外既不帶兵速往  
又不據實奏聞經朕節次嚴飭自知獲罪已重並  
接到魁倫令伊剿辦川北賊匪知會心懷恇怯始

石具摺以冬間腿疾復發爲詞懇請斥革以遂其  
避賊之計試思阿迪斯若非心存戀棧何不於上  
年冬間卽將腿疾奏出而必遲至今日乎竊係有  
意諉卸喪心昧良此而不加嚴辦則滿洲勦舊後  
裔豈不相率效尤阿迪斯著革職拿問交與勒保  
按律嚴審定擬具奏候朕再降諭旨其成都將軍  
員缺卽著德楞泰補授所有阿迪斯長子三等侍

衛兼頭等輕車都尉那彥瞻次子候補中書那彥  
柱三子那彥福四子六品蔭生那彥堪本應革職  
發往伊犁前阿桂在雲南軍營獲罪時阿迪斯兄  
弟卽曾發遣伊寧不記憶但念阿桂屢著功勲八  
任綸扉恪勤供職不忍將伊孫多人均令遣戍且  
那彥成現在軍營出力那彥瞻等皆其同祖兄弟  
格外加恩免其發遣俱著革職在家閒住其阿迪

斯承襲公爵及那彥瞻所募輕車都尉世職俱係  
阿桂所得並著該旗於年終照例辦理

同日廣厚奏言竊臣追剿高家營賊匪途次費

家山適經畧額勒登保叅贊那彥成追擊此股

賊匪亦至費家山當蒙面諭現在所帶兵力足

敷剿辦令臣卽赴西北一帶顧住鞏昌漳岷額

勒登保等追及伏羌之禮辛地方打仗殺賊甚



多賊卽向北直奔鞏昌大路臣帶領遊擊陳王

輯督率馬步兵丁趕至廣吳坡迎頭截擊該匪

大隊屯於石板山梁馬步數百人正從喬家峽

竄出我兵鎗箭齊發殲斃騎馬賊七人奪獲騾

馬四匹賊匪甫被額勒登保等痛殲不敢接仗

仍由喬家峽奔上石板山梁我兵奮力追趕賊

匪卽翻山由戲馬溝從寧遠漳縣邊界竄至岷

州宕昌等處向南狂奔額勒登保等帶兵緊躡  
其後派臣在逼近賊蹤西北一帶隨處堵截賊  
匪卽竄至西固之兩河口額勒登保分兵從禮  
縣秦州攔截那彥成帶兵由西固跟蹤追擊賊  
遂翻越瓦子山由斜坡向川省之南坪奔逸查  
斜坡一帶係土司楊宗業所管地界與洮岷緊  
相接壤該匪前從番地本朱寺一帶竄出岷州

若川省有兵堵截那彥成在後緊追難保該匪  
不仍折竄臣遵奉額勒登保指示卽在岷州之  
本朱寺一帶擇要堵禦務使賊匪不致四竄奏

入

上命軍機大臣傳諭廣厚曰甘境賊匪經額勒登保  
那彥成等先後痛加殲戮或折回陝境或向川省  
邊界奔竄甘境已就肅清此時防範最爲要緊廣

厚旣在岷州本朱寺一帶相機堵禦務須督率兵勇實力防堵勿令再有賊匪闖入甘境雖素稱土瘠民貧非賊匪蓄意搶掠之區但該處地方遼濶若川陝賊匪被官兵剿捕緊急聞甘境帶兵大員已先後赴陝安知不復向甘省無兵地方竄逸以冀苟延殘喘惟在廣厚認真防範勿令甘境再有一賊方爲不負委任

同日

上命軍機大臣傳諭長麟台布曰現在防堵賊匪必須鄉勇之力但聞各省招募鄉勇多係隨時招集賊至則聚而防守賊去則散歸本業良莠不齊去來無定且技藝生疎毫無紀律徒有虛名而不得實用自不如團練鄉勇常給口糧隨同官兵分佈要隘較爲得力然團而不練亦仍不過虛名充數

朕聞河南鄉勇每人日給錢文勤加操練至今團而不散於防堵最爲得力而長麟台布現亦籌辦團勇節據奏到情形尙爲認真當此剿賊喫緊之時自應立定章程實力辦理俾近賊處所在在防堵有人方於事有裨益辦賊之法不出堵剿二者疊經降旨明切曉諭剿捕之事責成帶兵大員防堵之事責成地方文武使賊匪前有攔截後有追

兵自無從四竄奔逃現在賊匪由甘竄回陝境額勒登保那彥成帶兵合剿所有各處隘口更當嚴密堵截俾額勒登保那彥成得以痛加剿殺伊二人帶兵素爲奮勇諒不肯稍遺餘力倘長麟台布守禦有方而額勒登保那彥成或竟有剿捕不力之事長麟台布卽當據實叅奏若鄉勇不能認真團練擱堵不嚴又任賊匪他竄則額勒登保那彥

成定將長麟台布奏朕必嚴辦示懲決不姑貸  
總之伊等如果同心併力速將賊匪剿辦完竣不  
獨額勒登保那彥成同膺懋賞卽長麟台布亦可  
預酬庸之典否則咎有攸歸不能輕恕也勉之慎  
之昨據魁倫奏嘉陵江西岸賊匪又復竄過潼河  
魁倫防堵不力已將伊革職今據德楞泰奏潼河  
船隻該縣並未遵照總督札諭移撤他處致賊匪



得以搶船徑渡茶毒生靈情罪重大現今德楞泰  
勒保查明該縣係屬何人一面奏聞一面卽在該  
處正法以爲地方文武守禦不嚴者戒若陝甘兩  
省亦有類此疎防縱賊之事則魁倫卽係長麟台  
布前車之鑒其正法之知縣卽係地方官榜樣不  
可不各知儆戒也

欽定剿平三省邪匪方略正編卷一百六十四

庚申年

四月初四日

丙戌

恒瑞奏言

臣

於途次採聞烏姓

大股賊匪現在洵陽之黑河溝陽山等處游奕

再學勝等小股賊匪亦竄入洵陽之西岔河一

帶滋擾並聞總兵劉之仁在鎮安縣養病查賊

匪俱在鎮安迤南

臣

不便拘泥前奏仍由藍田

商州一路前進是以由大山岔野坪趕抵鎮安

據該處官兵百姓俱稱大股賊匪現有二三萬人<sub>臣</sub>素聞陽山黑洞溝等處向有習教之徒此

股賊匪於正月間自石泉渡江後在彼往來游奕日久頃又據拏獲探信之賊苗士舉供稱此股賊匪大頭目名叫劉添成尙有姓烏姓曾者不知名字共有二萬多人三月初間又有西岔河居住之同教龐國勝帶領一千餘人歸入夥

內等語看入不無另有勾結人故日增月下不  
獨防堵東面爲要正須趕緊剿殺勿使蔓延查  
商州雖有國霖防堵而鎮安一帶劉之仁病未  
痊愈恐不足恃

臣

卽令原任將軍富成幫同該

鎮管領原帶兵勇仍在鎮安擇要堵截

臣

同總

兵柯藩分帶兵勇從茅坪青銅關一路前進現  
在大股之賊又分爲三股竄至趙家灣燕子嶺

松樹壩等處小股賊匪尙在西岔河焚掠勢甚  
散漫必須由東向西截殺方不致闌入楚豫

臣

惟有鼓勵兵勇盡力剿辦以冀及早蕆事再

臣

行抵鎮安據劉之仁將前在三岔河地方隨同  
多爾濟扎普打仗陣亡以及未經查出滿漢官  
兵造具清冊呈報前來內佐領那敏全福防禦  
傅格全布阿達那勝杜德昌倭克濟那驍騎校

南山拴柱叅將郭承緒都司劉振邦守備朱顯  
玉趙天相馬曰傑等十五員俱已尋獲屍身協  
領那全佐領阿爾松阿胡克慎驍騎校薩勒杭  
阿等四員屍身尙無下落查多爾濟扎普前次  
失利實因兵單致被衝散此次官兵在深山密  
林被賊戕害或係迷失道路尙未回營均未可  
定<sub>臣</sub>面囑劉之仁再行差派幹練弁兵將無下

落各官員以及千把外委兵丁詳細找尋候查

明時一併咨報撫臣台布照例咨部辦理奏入

上命軍機大臣傳諭恒瑞曰陝省商雒鎮安一帶賊股甚多既據恒瑞稱大股賊匪現有二三萬人又有劉添成及烏姓曾姓賊目三人於正月間自石泉渡江在彼往來遊奕並有西岔河居住之教匪龐國勝帶領一千餘人歸入夥內是陝境賊股分

投竄擾情形正爲著重自應相機前往剿捕而恒  
瑞往來其間並未與賊打仗摺內尙稱必須由東  
向西截殺方不致闌入楚豫將此一派虛詞敷衍  
入奏不知伊等待何時方行殺賊恒瑞著傳旨嚴  
行申飭且恒瑞係西安將軍在陝帶兵剿捕是其  
專責其由何路趕赴何路截剿之處總在恒瑞隨  
時酌量情形何必由五百里馳奏徒勞驛站耶



上又命軍機大臣傳諭額勒登保那彥成長麟台布  
曰恒瑞奏行抵鎮安該處官兵百姓俱稱大股賊  
匪現有二三萬人又有劉添成及烏姓曾姓賊目  
三人於正月間自石泉渡江在彼往來遊奕並有  
西岔河居住之教匪龐國勝帶領一千餘人歸入  
夥內等語以上各情節及匪徒姓名朕皆不知自  
正月以來從未奏及是陝境賊匪股數甚多情形

頗爲著重但逆匪等卽到處裹脅亦何至聚有二  
三萬人之多自係川陝交界地方教匪由石泉渡  
江後無人剿辦以致日聚日衆而南山內伏而未  
起之匪黨亦乘間竊發彼此勾連肆行竄擾長麟  
到陝後卽赴鞏昌辦理糧餉事宜或因相距較遠  
未能深悉台布則近在漢中目擊逆匪等如此橫  
行並未據實具奏而於賊目劉添成及烏姓會姓

龐國勝等究係何股賊匪由何處竄入是否係南山內新起之賊亦總未提及台布身任封疆所辦何事著傳旨嚴行申飭至陝省各股賊匪蔓延日久實繁有徒亟須趕緊剿捕恒瑞雖帶兵入陝並未與賊接仗祇以往來截剿空言敷衍入奏業經降旨飭諭此時額勒登保那彥成先後帶兵赴陝必須酌度機宜或分或合總將各股賊匪由東北

逼向西南務在陝境內設法殲除搜捕淨盡其各路防堵事宜則責成長麟台布實力辦理毋使賊匪輾轉奔逃致干咎戾

同日七十五奏言竊

臣

欽奉

諭旨留於重慶幫同守禦遵於初八日自順慶起程  
凡經過南充定遠合州沿河兩岸安設鄉團兵  
勇各卡一一留心察看並飭令日夜留心哨探

遇有賊匪蹤跡務須悉力堵截並將停泊船隻  
移泊對岸俾不致墮入賊計並面飭各縣汛官  
弁不時親身往來巡查十四日行抵重慶查重  
慶額兵一千五百二十二名除派防臺藏及出  
師共撥過兵八百一十三名各營汛防兵三百  
零六名外現存兵四百二名新兵四千五百名  
除出師一千六百四十八名派往各營汛防範

二千一百八十名外現存新兵六百七十二名  
以上共存城兵一千七十五名重屬江北巴縣  
合州大竹壁山定遠銅梁榮昌永川長壽各廳  
州縣共招募鄉勇五千五百八十名俱於各該  
管地方分安拏卡<sub>臣</sub>因腿傷未愈不能親身周  
歷會同知府石韞玉各派文武員弁逐加查察  
以昭核實期於有備無虞其重慶府城內外係

水陸通衢人烟稠密賊匪易於溷跡惟有督率  
存營遊擊李發先帶領在城兵丁實力巡防俾  
民心均歸鎮靜設有賊侵犯卽當設法相機策  
應協力堵截至臣傷疾復發近日痛雖稍減而  
傷處未經收口伸屈維艱不能履地惟有上緊  
調治期就速痊萬不敢藉此因循自蹈罪戾奏

入

上命軍機大臣傳諭勒保日前因七十五身任提督  
惟藉養傷爲名在大寧安坐不動日久遷延並未  
帶兵剿賊迨經魁倫催令前赴川西又稱瘡傷復  
發在順慶調理種種遲留玩悞業經降旨將七十  
五解任交松筠審訊今據七十五奏稱於三月初  
八日自順慶起程前抵重慶帶兵守禦自係未經  
傳奉解任諭旨松筠到湖北後因患病准令來京



陸見此時七十五已抵重慶與勒保軍營相距不遠卽著交勒保提到軍營確切查驗如七十五傷發潰爛屬實則其在大寧駐紮多日尙非無故逗遛自可遵照前旨留其頂戴卽令來京候旨免其治罪若七十五所稱傷發竟屬虛語則伊旣延玩於前又復捏飾於後必當從重懲治卽應將七十五革職鎖拏按律定擬監禁成都候旨至勒保帶

兵由中江一帶進發自己與施縉在潼川一帶將  
過河竄匪合力迎擊而德楞泰自東而西尤可前  
後來剿務須乘賊匪敗潰之際趕緊追截悉數殲  
除以期肅清川西方不負棄瑕錄用之意

同日楊揆奏言

臣

於本月十二日行抵廣元當

據探報偷渡嘉陵江賊匪經德楞泰帶兵剿殺  
連次得勝並將首逆陳得俸冉添元先後生擒

方冀乘此兵威就近迅加撲滅詎

臣

行抵金山

驛順道謁見魁倫適據建昌道劉清稟報賊匪

被剿情急於十八日由石梁子翻山在太和鎮

上游王家嘴涉淺偷渡兵單不能抵禦太和鎮

已被焚燒等情維時勒保亦同時趕抵金山驛

當與魁倫帶領各兵同赴中江一帶迎頭截擊

並將前駐江油彰明沿河防堵官兵飭令副將

托雲泰撤赴新店子趙家渡等處以防通省大路  
臣於魁倫等移兵進發後亦卽兼程前進以  
資彈壓伏查前次賊匪竄渡嘉陵江所有省城  
附近州縣尙藉潼河爲屏障茲又跣渡潼河則  
地勢平坦無險可禦情形更爲散漫連日偵探  
該匪等自過太和鎮擾至三台中江縣境經各  
路官兵分投追躡又有向遂寧樂至奔竄之勢

該處與成都所屬在在毗連防範極爲緊要茲  
臬司先福於交篆後復在省城抽帶官兵前赴  
趙家渡會同各鎮將分布堵截以壯聲威並催  
令現調之梭磨卓克采等處土兵俟到有千餘  
名卽交副將王承勲隨後帶往用資接應至  
臣  
經過漢州德陽新都等處沿途察看民情尙屬  
寧帖惟省城內外人烟稠密兼之各處避難民

防守更宜嚴密正在籌畫之際適有前奉魁倫  
札委派帶土兵之懋功協副將王承勲在省現  
有調到梭磨土兵三百三員名到省除挑驗退  
回外尙存土兵二百四十六員名並有卓克采  
土兵三百名接踵可到隨接魁倫來札飭令副  
將王承勲湊足一千土兵卽赴趙家渡會同署  
松潘鎮總兵扎雲泰堵禦等因

臣

當卽飛札飭

催各處土兵迅速到省並探得魁倫勒保已率  
兵由中江一帶進剿貴州總兵施縉帶領黔兵  
三千名由潼川一路繞至中江之興隆場大礮  
墩一帶迎頭截擊又經督臣派令託雲泰帶兵

二千名前來新店子趙家渡堵禦而新任藩司  
楊揆亦趕到省城隨於二十四日將藩司印信  
移交楊揆並在署臬司董教增將臬司印信移

交祇領臣當與楊揆商定卽攜帶臬司印信與

副將王承勲帶領已到土兵並再撥綠營官兵

五百名於二十五日辰刻拜摺後卽赴趙家渡

想彼時托雲泰自己到彼卽可會同商酌並與

王承勲相機堵剿一俟賊匪剿除該處地方寧

謐卽可將土兵並託雲泰官兵令其隨赴督臣

及勒保大營以備徵調至臣所帶綠營官兵一



千仍行撤回省城以便彈壓地方均奏入

上命軍機大臣傳諭楊揆先福曰現在德楞泰帶領  
勝兵奮迅攻剿勒保現由中江進發而施縉所帶  
貴州生力兵亦已會合兜剿賊勢自必窮蹙成都  
爲省城重地楊揆惟當鎮靜彈壓以定民心此時  
賊匪竄渡之後避難百姓紛紛進城其中亦難保  
無賊黨乘機混入楊揆所慮甚是務當設法稽查

加意防範爲要至趙家渡距省城九十里先福會同託雲泰卽在彼嚴密防堵不必再行帶兵前進至現在所調土兵較爲得力其原帶之綠營兵自應撤回省城俟地方寧謐再將土兵一併交與勒保帶領以資剿捕至冉添元一犯前經德楞泰奏明擒獲後解赴司監當卽降旨令魁倫將該犯轡割爲陣亡之朱射斗等設位致祭想近日魁倫自

無暇及此該犯係著名首逆夥黨衆多安知不妄  
生覬覦且亦別無應訊之語著楊揆卽遵照前旨  
將該犯提出多撥兵役監視凌遲處死梟示並慰  
忠魂勿再稽誅

初五日丁亥額勒登保奏言竊臣探得畧陽黑河

之賊又復逃竄並聞有合夥北竄平原之信臣

遂聲言統兵徑出寶雞大路剿洗賊匪等聞風

卽由留壩之高橋傍出大樹壩江口東竄

臣

仍

由甘省之徽縣兩當防其西折僭由廢邱關入

陝二十八日抵留壩之江口該處路逕紛岐而

目前陝省之賊或分或合傳聞人數頗衆自係

隨處裹脅大半在整厓城固洋縣五郎等處滋

擾陝省各鎮將俱帶有官兵堵剿惟在恒瑞來

信已帶兵前赴商州其餘鎮將等未經報到

臣

尙不深知業經一面飭查隨時調度一面統率  
現帶官兵於離城較近之處先行緊剿以期剿  
滅一股再滅一股現探賊匪有在太白河獅子  
嶺等處焚掠者與

臣

本日駐營相隔祇一百數

十里卽當趕緊進剿接據那彥成來信知追賊  
至卡狼寨地方將高馬二姓之賊痛加殲殺餘  
匪不及一千由卡狼寨南竄路近川境已飭防

守龍安之總兵百祥就近迎截並咨德楞泰帶

兵前來與臣會合是甘省已無賊匪臣卽札致

長麟酌調廣厚帶兵前抵階州文縣一帶留防

杜賊折竄甘省其龍安之紫門玉壘關等處地

勢本險該處堵截嚴密賊匪或不致深入川

西然百祥所帶之兵無多猶恐未足深恃臣已

飛札德楞泰就近酌派官兵千餘名星往龍安

一帶幫同百祥截擊又查從前自川陝竄往甘  
省之賊皆從棧道而去臣沿途察看地勢欲扼

絕賊匪不竄甘省必須於棧道分段據守要隘  
則已經竄陝之賊不能折回甘境而川中之賊  
亦不能再入甘界所謂先固藩籬自無內患此  
時總當合陝甘防堵之兵并召添鄉勇星羅棋  
布爲要而設立營卡以堵爲剿之處又在陝而

不在甘也茲聞長麟已由鞏昌取道秦州前來  
辦理臣於沿途接見鎮將已剴切曉諭於設卡  
安營後不得仍前株守總須彼此互相偵探於  
數十里外得有賊信或合兵出擊或伺其到來  
竭力堵禦不至驚惶賊匪自無由衝突如有疎  
縱斷不寬恕並令該鎮將於長麟到來一切聽  
其調度又近奉



諭旨前此川省所調黔兵令德楞泰酌留三千外其餘卽令阿哈保李紹祖帶赴陝省

臣

查過江之賊

節經德楞泰痛剿大獲全勝正當喫緊之際不可分其兵力卽過江之賊已淨尙須乘勝速了

川北川東餘孽倘以兵分見單或致剿辦稽遲

轉屬無益且

臣

今已來陝那彥成又將接踵而

至賊股雖多自可以次辦理似竟無須催調黔

兵已札致德楞泰留用此時川楚陝皆有賊匪  
川省之賊德楞泰屢經允捷再同勒保等併力  
剿辦定可尅日奏功楚北之賊松筠明亮等又  
已到彼亦當與倭什布妥辦川省之賊

臣

自西

先行緊剿不日那彥成到來更可分撥追擊誠

恐該匪等情急東竄恒瑞帶兵已在山陽商州

等處原可攔截

臣

准飛咨吳熊光於豫陝接壤

之處嚴飭將領等加意防堵賊匪如不向東竄

而在鎮安五郎南山一面臣已札囑恒瑞相機

自東進逼爲夾擊之計以圖及早蕝事

額勒登保又奏言臣前奏奏吉蘭泰防堵不力

奉

旨革去提督加恩臣給遊擊銜在軍營効力茲臣路

經徽縣之虞關察看地勢情形並查訪吉蘭泰

於上年十二月帶兵由白水江防堵嗣瑞亨於  
十二月二十六日帶兵前至虞關與吉蘭泰相  
距祇三十餘里彼此聲息原可常通乃二十七  
八兩日賊匪竄近該處乘間搶渡吉蘭泰旣未  
救援又不追剿固有應得之罪且查本年二月  
間德楞泰因須帶兵卽往四川所有剿潰之楊  
開甲股匪曾經札飭吉蘭泰跟蹤追剿吉蘭泰

未能緊躡截擊以致該匪由鳳縣之草涼驛遠  
竄南山亦難辭咎臣面見吉蘭泰詢知已六十  
九歲語言無序竟係年老糊塗卽以遊擊銜留  
於軍營亦屬虛耗營糧難期得力伏乞

皇上俯念吉蘭泰上年著有微勞應請拔去花翎仍  
留遊擊銜予以休致卽令回旗又瑞亨旣已帶  
兵前至虞關自應卽拏營卡乃臣訪得瑞亨任

聽官兵居住民房各自設處致賊窺伺衝突甚  
至損兵折將瑞亨雖墮馬傷腿誠屬有過無功

臣

昨見其傷已全愈察其才具亦屬平常應請

旨將瑞亨拔去花翎其臬司員缺卽請

皇上另行簡放並令瑞亨回京或應降用勒休之處

伏候

欽定均奏入

上命軍機大臣傳諭額勒登保那彥成長麟台布曰  
此次額勒登保所奏一切籌畫布置事宜俱屬妥  
協惟據稱在陝之賊或分或合傳聞人數衆多是  
目下各處情形陝省最爲著重現在額勒登保由  
留壩趕緊進剿那彥成亦自甘而來不日可會合  
一處昨經恒瑞奏兩大股賊匪聚集鎮安一帶業  
經降旨諭令額勒登保那彥成長麟台布併力同

心認真剿辦額勒登保等或分投截擊或併力進  
攻卽在陝省境內辦竣不可復令折回甘境亦不  
可復令闌入川省其豫省邊界再飛咨吳熊光督  
飭田永桐等嚴密防禦使賊匪無處奔逸在陝境  
一律辦竣方爲不負委任此時剿賊之事旣責成  
經畧叅贊而防堵機宜則係長麟台布專責節次  
諭旨甚明今據額勒登保奏稱察看地勢堵截賊



匪在陝而不在甘須於棧道分守要隘等語所見  
甚是總在長麟台布督率地方文武於各要隘分  
布兵勇嚴密堵截勿任賊匪衝突卡隘逸出奔逃  
以便額勒登保那彥成趕上截剿爲一鼓殲擒之  
計若防堵之鎮將及地方官等稍有疎虞豈特不  
可寬恕卽當一面鎖拏其情罪尤重者竟應正法  
示衆以儆其餘至所稱鎮將等帶兵現在何處堵

剿未經報到尙不深知一節殊屬非是額勒登保  
身爲經畧不論何路鎮將俱應聽候經畧指使今  
鎮將等帶兵在何處剿賊額勒登保尙未知之何  
以居中調度耶再所奏無須催調黔兵一節如此  
更好此項黔兵統歸德楞泰帶領剿辦川西之賊  
軍威壯盛更可尅期蒞事額勒登保係屬經畧無  
論在川在陝俱應通盤籌計也又另摺覆奏查明

吉蘭泰瑞亨貽悞情形所叅甚是惟定擬不免太輕已另降諭旨分別示懲矣此等年老及有病各員留於軍營無用若惟事姑息聽其戀棧必至貽悞事機且又身罹罪譴或其人從前曾經出力得功轉至不能保全不若及早奏明或卽令休致或撥回本任豈非兩全之道現在因大兵雲集陝省需用較多又撥銀四十萬兩併交長麟台布收貯

更足以敷應用但不可因帑項充裕遂不加意撙節也

上諭內閣曰前此四川竄匪由虞關闌入甘境彼時吉蘭泰在白水江一帶防堵距賊匪搶渡之處僅三十餘里吉蘭泰係提督大員並不前往救援以致賊匪竄入甘省滋擾當將吉蘭泰革去提督仍賞給遊擊銜在軍營効力以觀後效而楊開甲一

股賊匪業經德楞泰剿敗潰散嗣因德楞泰帶兵  
赴川與經畧額勒登保商酌將此股餘匪專交吉  
蘭泰追剿而吉蘭泰并未遵辦紫躡截擊又致逆  
匪等由鳳縣至草涼驛遠竄南山到處勾結蔓延  
至今尙未殲滅是吉蘭泰種種疎縱罪實難追額  
勒登保僅請將吉蘭泰拔去花翎仍留遊擊銜休  
致回旗未免懸存姑息上年吉蘭泰在甘省地方

堵剿尙無貽悞者因與廣厚同在一處耳嗣緣廣厚前赴西寧吉蘭泰卽不能認真堵剿可見上年甘省剿賊並非吉蘭泰之功且伊年已六十九歲昏憤糊塗因循戀棧似此貽悞之領兵大員若不嚴行懲治何以肅軍紀而勵戎行吉蘭泰著革去職銜卽在經畧軍營枷號示衆俟該處大功告成後再行發往伊犁自備資斧効力贖罪俾各路將

弁等共知炯戒至瑞亨前因帶兵受傷是以加恩  
賞戴花翎擢用臬司今據查明瑞亨受傷之處實  
係墮馬所致瑞亨身係滿洲不善乘騎已屬無能  
且帶兵前至虞關時未令卽拏營卡任聽官兵居  
住民房漫無約束致賊人窺伺衝突其咎甚重額  
勒登保僅請將瑞亨拔去花翎或降用勒休候旨  
定奪亦屬輕縱本應將瑞亨一併枷號示衆姑念

瑞亨本係文員究曾帶兵打仗其貽悞之處亦止  
此一次較之吉蘭泰有間瑞亨著革職從寬免其  
枷號卽發往伊犁自備資斧効力贖罪如該員已  
至山西著伯麟傳旨卽令起程前赴伊犁山西按  
察使員缺著文霈補授所遺陝安道員缺著長麟  
台布於該省候補道員內保奏二員候朕簡用

初六日

戊子

魁倫勒保奏言

臣

等接據探報賊匪



渡河以後卽分股四竄有由三臺縣所屬之景  
福院大雙墩一路向西直趨成都之勢施縉先  
由潼川赴龔家口扼住進省要路臣等於二十

二日由中江馳赴大雙墩適有賊匪探馬十餘  
人到來一見官兵卽折回奔逸我兵立時追趕  
殲斃五名生擒三名大夥匪衆卽連夜由釣嘴  
小路向東南一帶狂奔其勢非竄簡州卽奔樂

至<sup>臣</sup>等恐尾追無益於二十三日知會施縉均

由大雙墩取道梅子壩一路會合迎擊正值該

匪等分夥在梅子壩廣福堰兩處放火燒房隨

卽分兵兩路追剿共殲賊一百三十餘名生擒

鄧孝義等十一名訊知藍白兩號匪衆均欲由

中江直趨成都現經官兵兩次截住其大隊已

由胖子店竄去<sup>臣</sup>等連夜發兵次日辰刻行過

胖子店據報藍號賊匪現在攻撲象龍寨勢甚

洶湧臣魁倫卽督同署川北鎮薛大烈等由左

山梁而進臣勒保督同施縉等由山溝正路直

趨山寨詎賊匪一見官兵卽紛紛向南奔竄臣

等遙望人數不多疑其必有埋伏傳令各兵整

備前進行至官家山溝內果有伏賊千餘名直

前衝突我兵一在山梁一在山下兩路鎗箭並

發殲斃四百餘人生擒賊目楊長壽並賊匪楊  
三元等五十四名投出被脅難民李文元等二  
百四十三名時已昏暮卽在官家山劄營四更  
後忽有賊衆前來直撲都司哲楞營盤官兵奮  
力抵禦賊匪並不稍退直至天明兵勇齊出奮  
擊賊始退潰都司桂涵卽帶兵勇追趕至懶板  
橙地方殲獲多名鄉勇魏揚生擒賊目符得忙

供認藍號副元帥管領馬步戰手一千名係僞  
元帥冉泰順派令前來劫營致被追獲並據供  
稱各股賊匪在嘉陵江以西被官兵剿殺緊急  
先從江油彰明蒼溪昭化等處搶渡數次均被  
隔河鎗礮擊退復因敗竄至太和鎮一帶於十  
八日夜間在淺灘處所大衆踰過河來曾與兵  
勇打過一仗過河後卽分股散竄有向東南遂

寧安岳一帶竄去者有向西北三臺中江一帶  
奔竄者至藍號本有二千餘人自過太和鎮連  
破數寨沿途裹脅現在約有萬餘人與白號約  
會總要到成都川西一帶搶掠等語臣等當卽  
將符得恒楊長壽二犯凌遲梟示並將現獲各  
犯內訊明從賊日久之鄧孝義楊三元等三十  
八名均卽正法其餘俱係到太和鎮後甫經被

擄者各給路票盤費分別省釋擒獲符得恒之  
鄉勇魏揚給予七品頂戴出力兵勇亦酌量賞  
賚伏思成都附省一帶地方沃野千里向俱稱  
爲川西壩係川省最爲富庶之區現在賊匪渡  
河分夥亂竄旣形散漫勢更鴟張且處處可以  
直達省城亟須設法截回先以保護附省地方  
爲第一要務聞德楞泰已由太和鎮赴遂寧安

岳一路兜剿而來緣中間爲賊所阻數日未經  
得信此路文報未得通行查德楞泰先在南部  
派來阿哈保所帶馬隊三百餘名本日業已到  
來<sub>臣</sub>等惟有策勵兵勇隨時偵探賊蹤分頭迎  
擊以冀痛殲匪衆

魁倫又奏言川省軍興以來所需馬匹均於各  
營調用隨時採買補額其馬價自應按照定例



每匹發銀八兩惟因川省產馬本少連年軍務  
馬價更昂嘉慶三年經總理軍需局司道等籌  
議以上屆平定廓爾喀軍需案內採買塘馬每  
匹價銀十六兩臺馬每匹價銀十二兩均經奏  
明准銷在案此次採買馬匹係屬內地軍務固  
未便照依口外之例支銷但照營馬例價辦理  
實屬不敷請酌照臺馬例價每匹給銀十二兩

俟事竣後仍照營例八兩造報其每匹加增銀  
四兩卽由川省另籌歸欵詳據前督臣勒保批  
准咨明戶兵二部上年

臣

抵任後因吉林黑龍

江官兵需馬更替飭調營馬五百匹復准經畧  
額勒登保咨調解赴軍營騎用馬五百匹均經  
先後如數撥解其時因採買益多馬價加昂各  
營領價實難卽時買補又未敢任營廐空虛致

誤調撥當飭前藩司林儻等仍照原議於軍需  
項下動撥銀六千兩分給各標鎮協營照數購  
買歸營喂養查此次軍務節次調撥營馬不下  
二千餘匹均已遵照每匹給價銀十二兩伏懇  
聖恩俯在軫卹照廓爾喀軍需採買臺馬每匹十二兩  
之例准行給價購買備用所有例價八兩之外  
淨多四兩請於事竣日仍由川省另籌歸款報

部核銷現在德楞泰帶領滿漢官兵剿賊並所  
調貴州官兵亦卽陸續到齊需用馬匹不得不  
預爲籌備當卽一面飭局照每匹十二兩計算  
給價發營購買備調

同日托津奏言川省軍興以來耗費餉銀將及

二千餘萬兩

臣

仰叨

恩命專理儲糈深知

國家經費有常又蒙

皇上諄諄訓諭自當諸事留心慎重支銷總期當省則省當用則用亦不敢過爲苛刻現在以臣接

辦之日爲始統計舊存銀兩及已到之京浙兩餉並未到之山西餉銀通盤核算撙節支發約足兩三月之用惟盼各路官兵尅日擒渠蕺事庶得上紓

宵旰之勞卽

帑項亦可藉以節省至候補知府宋鳴琦和琿額

二員當卽飭令速行起程前赴省垣聽候藩司

委用又據福寧向

臣

具呈並望闕伏地碰頭據

稱接准額勒登保來咨欽奉

上諭據魁倫奏賊匪搶渡嘉陵江西岸係福寧擅撤鄉勇所致福寧之罪實不可追著卽將伊仍發伊

犁伏思福寧身受

國恩於一切軍儲事件及剿戮旗鼓寨賊匪俱未能  
辦理妥協仰蒙

皇上僅將福寧發往伊犁實屬罪所應得查嘉陵江  
一帶防堵鄉勇應添應撤向係各州縣臨期相  
度賊匪遠近情形報明總督核定隨時添撤俱  
有文案可稽此次賊匪搶渡在本年二月十五

日夜福寧係上年十月早職並非福寧擅裁兵  
勇所致川西完善之區慘遭焚掠所關匪細福  
寧實不敢爲魁倫代受其咎等語謹將原呈及  
案據總摺恭呈

御覽均奏入

上命軍機大臣傳諭德楞泰勒保日前此德楞泰追  
剿渡河竄匪由南部鹽亭等處帶兵進發先將半



渡之賊殲斃多人復在新店子地方奮力截擊殲擒首逆雷世旺等並大小頭目多名大獲勝仗魁倫等此次發招時自尙未知信息此股賊匪屢經官兵剿殺勢已潰敗現在德楞泰自東而西勒保施縉自西而東正河兩面夾擊務須乘兵威勝勢速行搜剿淨盡總當於四月內外將川西各股一律辦竣再徐添德係屬著名首逆必須擊獲自正

月過江後總未據查明下落或卽在此股賊匪內  
改名潛竄亦未可定並著留心訪察務期必獲毋  
任乘間狡竄至所奏各營買補備調馬匹請暫照  
廓爾喀軍需採買之例酌給加價銀兩各營缺額  
馬匹自應及時買補預備軍營檄調其所請酌給  
加價之處已交部議奏卽部中按例議駁朕自可  
降旨准行也前因魁倫奏賊匪搶渡嘉陵江係福

寧擅撤鄉勇所致是以降旨將福寧發往伊犁今  
據托津奏到福寧供稱與魁倫原奏互異各省僱  
募鄉勇賊來則上緊加添賊去卽率行裁撤朕所  
素知此案前據魁倫奏稱定遠縣境本有鄉勇嗣  
因經費不敷奉文裁撤已諭令查出原奉文書實  
係何人所發核明定案如上年定遠鄉勇係由福  
寧行文裁撤此時所供並非實情則福寧狡飾之

罪更無可辭自應發往伊犁示懲卽非福寧裁撤而伊前在旗鼓寨有殺降一事已難辭咎且福寧曾任湖廣總督任教匪蔓延滋擾至今未能辦竣其罪亦無可諉自應仍發往伊犁至該縣孫熙如並未奉有裁撤文書而於賊匪逼近定遠時既不預行稟請添募迨至賊匪竄近江岸復因節間頑燈疎防搶渡行兵剿賊有何心緒度節況此一二

年中尤屬不可大約伊自知罪重又捏稱奉文裁撤藉詞諉卸則孫熙疎縱於前捏飾於後其罪尤重至魁倫之重罪在縱令賊匪復渡潼河是以將伊革職拏問其前此疎防嘉陵江之罪曾明降諭旨降爲三品頂戴尙係罪之輕者若裁撤文書並非魁倫給發於伊本罪固無可減卽係上年孫熙稟請裁撤魁倫據稟批准於罪亦無可增但當究

明孫熙原奉文書方足以成信讞著交德楞泰會同勒保向福寧魁倫及孫熙逐一究訊並將原奉文書查出附報呈覽一面定擬具奏現據福寧呈稱嘉慶四年六月定遠縣裁撤鄉勇係勒保總督任內核准之事等語上年六月川省賊匪不過在

川東川北奔竄勢已窮威川西地方並無賊氛是以額勒登保得以前赴甘省剿辦竄匪彼時定遠

所屬尙爲寧靜該縣請將該處鄉勇暫行裁撤勒  
保卽行批荏本無不合至本年正月賊匪搶渡嘉  
陵江其咎實因魁倫並未酌量地方緊要情形預  
令該縣添募鄉勇所致勒保於此事無所用其迴  
護惟當與德楞泰秉公查審速行據實定案也

上又命軍機大臣傳諭托津曰現在竄入川西賊匪  
節經德楞泰剿敗目前雖搶過潼河復經德楞泰

併力夾擊川西地方可期肅清應卽移兵前赴川  
北一帶剿捕零星竄匪是川境賊匪不過四月內  
外卽可悉數殲擒托津統計川省餉銀現足兩三  
月之用若川省軍務夏初可以全竣自無庸再行  
撥餉但亦不得因餉項充裕不加撙節仍當遵照  
前旨核實支銷勿令稍有冒濫至所奏福寧呈出  
案據一節已有旨交德楞泰會同勒保審辦如福



寧現在達州尙未起身著托津卽送交德楞泰勒  
保軍營聽候質詢可也

初七日

巳丑

上命軍機大臣傳諭額勒登保那彥成日前經長麟  
奏請於五郎廳添設寧陝鎮總兵一員當卽將劉  
之仁調補五郎地界南山路逕叢雜形勢扼要旣  
經設立總兵必須強幹歷練之員在彼鎮守方足

以資控馭劉之仁本係與多爾濟扎普在洵陽鎮  
安一帶剿賊多爾濟扎普陣亡後該鎮旋即患病  
雖據台布奏劉之仁因在溝內追賊淌水衣裳俱  
濕感寒受病續據奏稱該鎮近已病痊但節次陝  
省軍營奏報總未見該鎮帶兵殺賊或劉之仁本  
係無能前此因多爾濟扎普失利以致驚恐得病  
不能振作亦未可知其人朕素未深悉此時新設

寧陝鎮員缺一切防堵稽查訓練新兵關係緊要  
劉之仁倘不能勝任卽著額勒登保那彥成據實  
查明於陝甘二省總兵內擇其明白曉事之人酌  
擬數員開單進呈候朕簡調若劉之仁竟能勝任  
卽覆奏不必更調也

上又命軍機大臣傳諭長麟台布曰陝西南山老林  
一帶路逕險窄樹木茂密爲賊匪遁逃之藪前此

明亮在陝剿賊時總以賊匪竄入老林官兵不能  
追剿爲詞上年那彥成帶兵入山搜捕張漢潮餘  
匪亦未能痛剿仍令逸出而南山內至今尙有五  
家營賊匪在彼屯聚出沒該處老林雖係險阻但  
既有路逕可通自必有道里可考斷無任其藏垢  
納污之理上年十月內曾諭令台布察看山內地  
方形勢或安設營汛移駐弁兵以資彈壓嗣據長

麟奏請在五郎地方添設總兵將所募鄉勇入伍  
充兵已照所請添設寧陝鎮總兵一員自應卽於  
南山內分段安設營汛聯絡聲勢使賊匪不能再  
行竄入潛蹤且此等地方旣係山逕僻雜延袤廣  
遠與其置之空閒莫若酌爲經理安置難民務令  
得所將山內老林量加砍伐其地畝旣可撥給流  
民自行墾種而所伐材木卽可爲建蓋營廨民廬

設良吏行保甲以實心經理仿照前明原傑辦理  
鄖陽之制其實在幽八險峻人跡罕到之處竟當  
查明封禁如此分別辦理則南山老林內不致仍  
爲盜藪而失業流民日久即可作爲土著既有恒  
產必有恒心於招徠安撫及因地制宜之道實爲  
兩有裨益者長麟台布歸入善後事宜內認真妥  
辦以期地方永臻寧謐

初九日

辛卯

上命軍機大臣傳諭四川陝甘湖北河南各督撫曰  
教匪之事起於湖北沿及河南陝甘四川地方被  
時各該督撫往往藉軍營出力爲詞任意保奏私  
人得膺陞賞並有將幕友親串廁入者與實在出  
力之人漫無區別從前督撫如宜綿景安秦承恩  
永保等皆因貽誤軍務分別治罪畢沅汪新均已

病故伊二人所保各員如胡齊崙卽係奏請賞戴  
花翎加按察使銜此外濫邀保薦者自不一而足  
此等冒功之人若不查明甄別不足以昭懲勸著  
傳諭曾經用兵省分各督撫等查明嘉慶元年以  
後三年以前各省因軍功保奏人員內如有衆人  
共知冒濫確有可據者卽當指名叅奏其曾經賞  
給花翎藍翎及加按察使道府同知知縣陞銜者



著一併開列名單進呈並於各員名下將因何事  
出力係何人保奏之處詳悉註明候朕按名稽覈  
分別辦理以杜冒濫而慎名器